
LAGERBUCH
BISSINGEN:
FRÜHMESSPFRÜNDE
SCHÜTZINGEN
1570

344

reinhard hirth
2015

Inhalt

01 Einleitung.....	3
01-01 Register vber den Flecken Bissingen.....	3
01-02 Anfang.....	3
02 Beschreibung des Schützingen Hofes	3
02-01 Rechtslage	3
02-02 Besitz des Schützingen Hofes	4
02-03 Rückzinsler	7
02-04 Kaufbrief des Schützingen Hofes.....	7
03 Beschreibung des Ossweiler Pfründhofes	10
03-01 Rechtslage	10
03-02 Besitz des Ossweiler Pfründhofes	11
03-03 Weitere Zinsverpflichtungen des Ossweiler Hofes	15
03-04 Rückzinsler	15
04 Schluss	15
04-01 Summa	15
04-02 Editionsbericht	16

01 Einleitung

Schitzingen die Friemeß <367 r>

01-01 Register vber den Flecken Bissingen.

Anfang Fol: 367.

Erblicher Hofe mit den owigen vnablässigen Zinsen vnd gülten, Järlichen vff Martinj gefallendt, fol: 368.

Järlicher vnablässiger dinckel vsser einem Hof, Järlichen vff Martinj gefallendt, fol: 385.

Summa vber das einkomen Jm Flecken Bissingen, fol: 397. <367 v>

01-02 Anfang

Vff den achten tag des monats Septembris, Anno etc der wenigern Zal sibenzig, hab Jch, oftgenanter Renovator Laux Feickelmann, hernach geschribne bede höf zu Bissingen an der Entz durch personlich beysein vnd selbsten angeben der hernach geschriben Hofmeyere <erneuert>. Vnd nach dem Jch solches vollendt, hab Jch gleich daruff solche öffentlich Jnen, Mayern, publiciert, Jn beysein Melchior Etzels, Schultheissen, dessen alles mergedachte Mayer ohne ainich widersprechen vnd widerred angichtig vnd gestendig gsein. <368 r>

02 Beschreibung des Schützingen Hofes

02-01 Rechtslage

Erblicher Hof mit den Öwigen vnablösigen Zinsen vnd Gülten, Järlichen vff Martinj gefallendt

Hans Biß zue Bissingen hat Jnnen vnd besitzt ainen Hof, der Schitzinger oder streychers hof genannt, den hievor Hans Gensschopf besessen hat, Jst sein Jnhabers erbguth vnd der Friemes zu Schitzingen Aigenthumb. Daraus hat er hievor bemelter friemes zu Järlicher öwiger vnd vnablößiger gült vff Martinj an wolgeseüberter frucht vnd Kaufmans guth gezinset vnd vff sein Maiers thennen gewert vnd dargemessen, alles alt Groninger meß, benanntlichen Rocken Sibentzehen Malter, die thun new Württembergisch Landmeß ailf Schöffel, drew Simmerin, vierthalben vierling, ein ecklen, daruff bey dem hof <368 v> oder Gültman drew ecklen mit zwölf schilling Mintz erkaufft. Dinkel sibenzehen Malter, die thun new Landmeß zwölf Schöffel, sechs Simmerin, Habern sibenzehen Malter, die thun Landmeß vierzehen Schöffel, ain Vierling. Erbis zwey Simmerin, die thun Landmeß ain Simmerin, ain Vierling, drew ecklen, ain Viertel. Daruff ist von wegen der früemes bey dem hofman erkaufft, drew vierthailen mit sechs schilling. Leinsen zwey Simerin, die thun new Landmeß ain Simerin, ain Vierling, drew ecklin, ein Viertheilen, darauff gleichgestellt bey dem hofman drew Viertel mit sechs Schilling erkaufft.

Also zinst man hinfüro vsser dem genannten hof dero friemes <369 r> Schitzingen, Järlichen vff Martinj vnd bey dem Zinsman vff dem thennen zu empfaen guter lauterer vnd sauberer frucht Kaufmans guth, nämlich Rocken ailf Schöffel, vier Simerin, Dinkel zwölf Schöffel, sechs Simerin, Habern vierzehen Schöffel, ain vierling, Erbis ain Simmerin, anderhalben vierling, Leinßen ain Simmerin, anderhalben vierling

new Landmeß,

Jdem:

Rocken 11 schl. 4 Srj., Dinkel 12 schl. 6 Srj., Habern 14 schl. 1 vlg., Erbis 1 Srj.
1 ½ vlg., Leinßen 1 Srj. 1 ½ vlg. New Württembergisch Landmeß <369 v>

02-02 Besitz des Schützinger Hofes

Güeter Jn sollichen Hofe gehörig:

40-D Ain Behausung, Hofraitin vnd Scheuren mit aller Zugehörd vnd gerechtigkeit, zwischen der widumb vnd den Lorchheimer Hofacker gelegen, stost hinden vff dis hofs nachbeschribnen Acker vnd vnden an die gassen.

Äcker Jn der Obern Zelg

40-O-01 Anderhalb Morgen Ackers, Hinder der obgemelten Hofraitin, zwischen der Widumb vnd den Lorchhaimer sechs morgen ackers gelegen, stossen oben vff den Oßweyler Hofacker vnd vnden an vorgeschribne Hofäcker. <370 r>

40-O-02 Zwen Morgen ackers bey dem Obern veld, zwischen Hans Grossen vnd der anwanden gelegen, Stossen oben vff Othmar Höppen Kinder wißen vnd vnden vff Stoffel Herrenmann.

40-O-03 Anderhalb Morgen ackers, hinder erstgemeltem acker, zwischen Martin Redern vnd Stoffel Herrenman gelegen, stossen oben vff Hans Grossen vnd vnden an Hans Vischers wittib.

40-O-04 Zwen Morgen ackers ob dem Bentzen Rein, zwischen Jacob Geiger vnd Michael Schell ein vnd anderseits Hans Grossen gelegen, stossen oben vff Mölchior Etzel Schulthaißen vnd vnden an Oßweyler Hofacker. <370 v>

40-O-05 Ain Morgen ackers ob dem Bentzenrein, zwischen dem Widem Acker vnd Michel Schmolenwein gelegen, stost oben vff Hans Gleß vnd vnden an Thoman Wunderer.

40-O-06 Sechs Morgen Ackers vff dem Hohen Calmat, zwischen Jacob Zehe von Engerschen vnd Hans Volmer gelegen, stossen oben vff die allmeindt vnd vnden vff Peter Volmern.

40-O-07 Drew Viertel ackers Jn Creitzäckern, zwischen dem Oßweyler hofacker vnd dem gwendt gelegen, Stossen oben vff Dionisius Furderers erben vnd vnden an Stoffel Herenman. <371 r>

40-O-08 Ain halben Morgen ackers, auch Jn Creitzäckern, zwischen Michel Furderern vnd Bernhardt Tengern gelegen, stost oben wider vff Jne, Bernhardt, vnd vnden an Barbaram, Alexij Kleinen Hausfrauen.

40-O-09 Ain halben Morgen ackers Jm Heckhen äckerlen, zwischen Thoman Hofacker vnd Martin Rödern gelegen, stost oben an die Allmeindt vnd vnden vff

Dionisius Furderers erben.

40-O-10 Funf Morgen vngevarlich Ackers Jn fuchs schwentzen, zwischen Thoman Hofacker vnd dem gewendt weingarten gelegen. Stossen oben vff Bergamer <371 v> Marckung vnd vnden an Bissinger allmeindt.

In der mitteln Zelg

40-M-01 Ain halben Morgen ackers vnd Garten, Jst Jetzt alles ain Krauthgarth hinderm linden Garten, zwischen Marx Schneyder ein vnd anderseits der allmeindt vnd Thoman Hofackers garten gelegen, stost hinden vff Martin Röder vnd vornen an die allmeindt garten.

40-M-02 Ain Morgen Ackers vngevarlich vnderm Asperger weg, zwischen Jacob Grossen vnd Jung Wolff Miller gelegen, stost oben <372 r> vff Michael Visenheuß vnd vnden an bemelten Asperger weg.

40-M-03 Anderhalb Morgen Ackers vngevarlich beim Vnholden Bömlin, zwischen Martin Rödern vnd dem allmeindt weg gelegen, stossen oben vff den Lorchhaimer Hofacker vnd vnden an Michel Schneydern.

40-M-04 Anderhalb Morgen ackers Jn der Eyckhers Halden, zwischen Hans Millern vnd Stoffel Herenman gelegen, Stossen oben vff Xander Schellen vnd vnden an Peter Volmer. <372 v>

40-M-05 Ain Morgen vnd ain Viertel Ackers vngevarlich ob der Eyckers halden, zwischen Hans Schellen vnd Bernhardt Tengern gelegen, stost hinden vnd vornen an Oßweiller hofacker.

40-M-06 Zwen Morgen vngevarlich Ackers, vnderm Dammerweg, zwischen Joß Ruoffen von Damm vnd Peter Volmer gelegen, Stossen oben vff bestimbten Dammerweg vnd vnden an Balthus Schobers graben Acker.

40-M-07 Drew Viertel vngevarlich Ackers mitten Jm feldt, zwischen Dionisio Fürderers erben vnd Hans <373 r> Glessen gelegen, Stossen oben vff den gültman selbs vnd vnden wider an Hans Glessen.

40-M-08 Ain halben Morgen Ackers ob dem Dammerweg, zwischen dem Oßweiller hofacker vnd dem gwendt ainer vnd anderseit Bebion Grossen gelegen, stost oben an Mathis Volmers Wittib vnd vnden vff Melchior Etzel.

40-M-09 Anderhalb Morgen ackers vngevarlich vnderm Gröninger weg, zwischen Enderis Tenger vnd Michael Engelhardt von Möglingen gelegen, stossen oben an hailgen acker vnd vnden vff Dionisius Furderers Erben. <373 v>

40-M-10 Ain Morgen vngevarlich ackers Jm grundt, zwischen Mölchior Etzel vnd Michel Dirrmans erben von Damm gelegen, stost oben vff Hans Kleinen vnd vnden an Jheronimum Guthjar.

40-M-11 Anderhalb Morgen vngevarlich Ackers, dahinden Jn dem grundt, zwischen Dammer, auch Bissinger vndermarckung vnd Barthlin Manspergern gelegen, stossen oben vff sein Hans Bissen aigen acker vnd vnden vff Martin Röderer.

40-M-12 Sechs Morgen vngevarlich Ackers auch Jm grundt, zwischen <374 r> Hans Fürderers vnd Marx Fürderern gelegen, Stoßen oben wider vff Hans Fürderers erben vnd vnden an des Hailgen Sanct Kilians Hofacker.

40-M-13 Zwen Morgen ackers vff der Reuth, zwischen Steffan Herreman vnd Hans Volmarn gelegen, Stossen oben vff des Hailgen Sanct Kilians Hofacker vnd vnden an Xander Schellen vnd Conradt Widman.

Jn der Vndern Zelg

40-U-01 Ain Morgen ackers vngevarlich Jm Hammerschlag, zwischen dem Oßweyler Hofacker vnd Conradt Ruckenbrot gelegen, <374 v> Stost oben vff Martin Bissen vnd Jacob Geigern vnd vnden an die Aal.

40-U-02 Ain Morgen ackers vff dem Katzenbühel, zwischen Wernher Zeiterlen vnd Conradt Ruckenbrot gelegen, stost oben vff Bissinger allmeindt vnd vnden an gemelten Ruckenbrot.

40-U-03 Ain halben Morgen ackers vff der Schleifgrüeben, zwischen Hans Cleinen vnd Peter Volmer gelegen, stost oben vff alt Michael Schneidern vnd vnden an Lorchheymer hofacker.

40-U-04 Zwen Morgen ackers Jn Rehen ackern, zwischen Eberlen <375 r> Mochel von Plochingen vff den Fildern beederseits gelegen, Stossen oben vff Dionisius Furderers erben vnd vnden vff Hans Fürderern.

40-U-05 Anderhalb Morgen ackers zu Hochen brunen, zwischen dem widumb vnd dem gwendt gelegen, stossen oben vff den Lorchhaimer Hofacker vnd vnden an Conradt Ruckenbrot.

40-U-06 Zwen Morgen Ackers vff Ridern, hinderm Bissinger Holtz, zwischen Michael Vißenheußern vnd Jung Wolff Millern gelegen, stossen oben vff Stoffel Herrenman vnd vnden an gemelt Bissinger Holtz. <375 v>

40-U-07 Drey Morgen ackers Jm Falcken acker, zwischen Bissinger Holtz vnd sein gültmans aigen acker gelegen, stossen oben vff Hans Volmern vnd vnden an Lorchheimer Hofacker.

40-U-08 Drey Morgen vngevarlich ackers, bey den spitzigen Bömen, zwischen Pfarrher Nicolao Maiern vnd Hans Fürderern gelegen, Stossen oben vff Bissinger holtz vnd vnden an den Widumb acker.

40-U-09 Anderthalb Morgen vngevarlich ackers ob der Brandthalden, zwischen Thenges Grossen vnd Hans Hagern gelegen, stossen oben vff Marx Fuderer vnd vnden <376 r> an Jacob Zehe von großen Jngershaim.

40-U-10 Drey Morgen vngevarlich ackers am Dammer pfad, zwischen widumb acker vnd Michael Zeiterlen gelegen, Stossen oben vff Hans Zeitgnug vnd vnden an sein gültmans aigen Acker.

Wisen Jn disen Hove gehörig

40-P-01 Zwen Morgen vngevarlich Wisen, oben an Calmas furth, zwischen Martin Rödern vnd Michel Engelhardt von Meglingen gelegen, stost oben wider vff Martin Rödern vnd vnden an die Entz. <376 v>

40-P-02 Vierthalb Morgen wisen am Bergamer furth, zwischen der Widumb, genannt Kißels wisen, vnd Matheus Volmers wittib gelegen, stossen oben vff den Rappen acker vnd vnden an die Entz.

40-P-03 Vier Morgen vngevarlich wisen vnder der furgk gassen, zwischen dem Aalwasser vnd dem allmeindt weg gelegen, Stossen oben wider vff bestimpten allmeindt weg vnd vnden an Dionisius Fürderers erben vnd Stoffel Herenman. <377 r>

02-03 Rückzinser

So zinst widerumb Jn disen hove gehörig:

40-RZ-01 Dionisius Fürderers Kindt zinsen widerumb Jn disen hof Järlich auf Martinj, Jedem Jnhaber dis hofs zu antwurten, vsser Jrem Haus, Scheuren vnd Hofraitin, zwischen Laux Schmiden vnd Jörg Theissern gelegen, Stost vornen an die gassen vnd hinden wider an Jörg Theissern, Württemberger siben schilling.

02-04 Kaufbrief des Schützinger Hofes

Vnd Jst vmb Jetzt vorbeschribnen hof ain Kauf vnd vertigungs brief, besigelt entgegen, mit sondern darin vermelten Freyhaiten etc. Derselbig von wort zu wort, als nach stäth, lautendt: <377 v>

WIR dis nachgeschriben, mit Namen Hans vnd Conradt von Sachsenhaim, gebrüedere, bekennen vnd thun khundt allermeniglichem mit disem offen brieve, das wir für vns vnd vnsers Bruder Bernhardts säligen Kind, der fürminder wir seien, vnd für all vnser vnd Jr erben vnd nachkomen, eins rechten, redlichen, stäthen, öwigen, onwiderkomlichen Kaufs verkauft vnd zu kaufen gegeben haben; alsdann ain Jetlicher kauf billich von rechts wegen Craft vnd macht hat vnd haben soll an allen enden vnd stetten, vor allen rechten vnd gerichtten, gaistlichen vnd weltlichen.

Vnd geben auch zu kaufen mit rechter wissendt Jn Craft dis briefs dem Ehrsamem Gaistlichen Herrn Hansen Wechtern, früemesser zuo Schitzingen, vnd allen sein nachkomen, Pfröndern vnd derselben <378 r> Pfrundt vnsern Freyen vnd Öwigen hove zu Bissingen, als den ytzt bauwet Claus Vrbecher mit allen seinen rechten, gewonhaiten vnd Zugehörden, nichtzit daran ausgenomen. Geht zu rechter Hofgült sibenzehen Malter Rockens, sibenzehen Malter Dinkels, sibenzehen Malter Haberns,

zwey Simmerin Erbis vnd zwey Simmerin Leinsen vff ain Jeglichen Sanct Martinstag, vnd Jst sonst gantz frey aigen, vn bekümmert Steur, Schatzung, frondienst vnd aller vffsatzung vnd ledig, vnversetzt. Das sagen wir bey guten trewen, an rechter Aidts statt. Vnd darzu vier Malter Dinkels Järlicher gült vsser der Pfrondt Hof von Oßweyl, als den yetzo bauwet der Stoltzer vnd Kilio von Bissingen.

Vnd ist diser Kauff bescheen vmb drewhundert vnd sechtzig guldin <378 v> guter Landswerung, der wir von dem obgeschribnen Pfrüender von derselben Pfrundt wegen, also bar Jn vnser hand vsgericht, bezalt vnd gewerth seindt, darmit wir vnsern schaden fürkommen vnd frummen geschafft han. Daran vns wolbeniegt.

Hieruff haben wir, obgedachte verkeüfer, für vns, vnser Bruder Burckharts säligen Kind, vnser vnd Jr erben vnd nachkomen demselben Pfrundner, allen seinen nachkommen vnd derselben Pfrundt den vorgenannten hofe, davon Jn Järlichs vff ain Jeglichen Sanct Martins tag oder vngevarlich Jn den nechsten vierzehen tagen darnach zu rechter Hofegült sibenzehen Malter rockens, sibenzehen Malter Dinkels vnd sibenzehen Malter Haberns, zwey Simerin erbis vnd zwey Simerj Leinsen zu Bissingen Jn der Scheu- <379 r> ren vff dem thenn, recht Kaufmans guth groninger meß, samenthäftig von ainem Haufen zumal gemeßen vnd geben werden soll, mit allen seinen rechten, gewonhaiten vnd Zugehorden für frey aigen, vn bekümmert steur, schatzung, Frondienst vnd aller vffsatzung, vnd darzu vier Malter Dinkels Järlicher gült vsser der Pfrundt hove von Oßweil, als vorstoth, Jetz Jn gendts vnd er Pflichten lediglich von vnd vsser vnsern Händen gewalt vnd gewere Jn der vorgenannten Pfronder Händ gewalt vnd gewere gegeben, vnd geben Jn auch also denselben hove mit den benännten gülden vnd die vier Malter Dinkels Järlicher gült, mit rechter wissendt, Jn Craft dis briefs.

Vnd setzen vns, <379 v> vnser Bruders Bernhardts säligen Kind, vnser vnd Jhr erben vnd nachkomen daraus vnd die vorgenannten Pfrüender von derselben Pfrundt wegen darin Jn recht nutzlich beseß, mit allen worten vnd Werken, die von rechts oder gewonhait wegen darzu gehörn sollen oder mögen, das sie füro denselben hove mit allen nutzungen, rechten, gewonhaiten vnd Zugehörden vnd die vier malter Dinkels Järlicher gült Jnhaben, nutzen, nießen, gebrauchen, besitzen, besetzen vnd entsetzen, damit gefarn, thun vnd lassen sollen vnd mögen als mit andern der Pfrundt aigen güetern, wie Jn füegt, ohn vnser vnd vnser Bruder Burckhardts säligen Kind, all vnser vnd Jr erben vnd meniglichs von vnserwegen Jrrung, hindernus vnd widerred.

Vnd <380 r> Wir verzeihen vns auch des vorgenannten Hofes, mit allen seinen nutzungen, rechten, gewonhaiten vnd Zugehörden, auch der vorgeschribnen vier Malter Dinkels Järlicher gült für vns, vnser Bruder Burckhardts säligen Kind, all vnser vnd Jr erben vnd nachkomen, gentlich, lüterlich vnd öwiglich, Jn Craft dis briefs, kein widerforderung noch ansprach daran vnd darnach nimer mer zu haben noch erlangen, mit oder ohn gericht, gaistlichen oder Weltlichen, Jn kein weiß.

Vnd gereden vnd versprechen bey guten trewen, an Aid statt, für vns, vnser Bruders Burckharts säligen Kind, vnser vnd Jr erben vnd nachkomen, den vorgenannten Pfründern von derselben Pfrundt wegen, sollichen hove mit allen nutzungen, rechten, gewonhaiten vnd Zugehord, vnd <380 v> die vier Malter Dinkels Järlicher gült zu vertigen, zu verstehn vnd zu versprechen, für alle rechtlich

ansprach vnd für ledig vn bekümmert, frey aigen guth, als vnser Vatter sälig vnd wir bisher herbracht, Ingehabt vnd genoßen haben, nach stattrecht, aigens recht, Landrecht vnd mitrecht, ohn Jrn schaden, so dick es noth beschicht.

Thäten aber wir sollich vertigung vnd versprechung nit, so Jnen eintrag vnd Jrrung daran geschehe, wes sie dann des schaden nement, den sie vn geschworen mit schlechten worten gesprechen mechten, glauben wir Jnen vhn alles rechtigen gantz bekern vnd Ausrichten, ohn Jren schaden, als dick es not geschicht.

Vnd des alles zu guter sicherhait, so haben wir zu vns, vnser Bruders Burckharts säligen Kinden, <381 r> vnser vnd Jren erben, den vorgenannten Pfründnern vnd Jren nachkomen zu rechten vertigs bürgen gesetzt die Erbarn, weißen Schulthaißen vnd Richter zu grossen Sachsenheim, für sie vnd Jr nachkomen Schulthaißen vnd richtern, die an Jr statt gesetzt werden, mit geding, wa Jnen sollich vertigung Jn vorge<nannter> weiß nit gescheh, wen den darnach vber kurtz oder lang, wir vnser Bruder Burckhardten säligen Kind, vnser vnd Jr erben vnd die Jetzge<nannten> Schulthais vnd richter vnd Jr nachkomen, all oder ein theil, mit betten oder briefen, zu Haus, zu hof oder muntlich gemant würden, dieselben gemanten sollen bey guoten trewen, an Aids statt, Jn den nechsten acht tagen nach der ersten manung vnser Jetlich ein Knecht mit ainem laistbarn Pferdt vnd die genannten Schulthais vnd Richter <381 v> mit aigen Leiben, ghen Vayhingen, Jn ains offen gastgeben Haus, das Jn benannt würt, vnd sollen darin laisten vnd keiner die Laistung verziehen vff den andern vnd recht geselschaft halten, darvon nit lassen, so lang vnd vil, bis Jnen vertigung nach aller notturft, ohn Jrn schaden gescheen wehr, vnd als dick ain Pferdt Jn der laistung abgieng oder verlaist würt, sollen wir ander laistbar Pferd wider Jn laistung stellen Jn vorge<nannter> weiß.

Wehr auch, das sollich vertigung verzogen würt vnd Jn zweyen Monaten nit geschehe, wir laisten oder nit, so hetten dieselbigen Pfrondner vnd meniglichs, wer Jn helfen wöllt, gewalt vnd guth recht, das sie mögen vnser verkeüfer, vnser erben, auch der Jetzge<nannten> bürgen vnd Jr nachkomen Pfandt leüth, guth, renth vnd gült, Jn stetten, <382 r> Dörfern, Schlössen, vff dem Land, ligens vnd varens, Jn gemein oder Jn sonder nöten, Pfendigen, beschedigen, angreifen mit gewalt, ohn oder mit gericht, geistlichen oder weltlichen, wie Jn füegt, wa sie das ankomen mögen, vnd mögen das versetzen, verkaufen oder Jn behalten, damit gefarn, thun vnd lassen, als mit andern der pfrundt aigen güetern, vngefrevelt, so dick vnd vil, bis Jnen volkomen vertigung vnd bekerung nach dis briefs lauth gescheen ist, ohn Jren schaden. Vnd sollt vns, vnser erben vnd die Bürgen vnd Jr nachkomen guth, Pfanth leüth, renth vnd gültt, hiewider nicht schirmen, befriden noch helfen, kein gebot oder verbot, kein gericht, gaistlich noch weltlichs, gleit, Freyheit noch Jchtzit anders, das Jetzt ist, ye ward oder Jn kunftigen Zeiten erdacht oder vffgesetzt werden möcht, Jn kein weiß vngevarlich. <382 v>

Vnd wir, die vorge<nannten> Schulthais vnd Richter zu grossen Sachsenhaim, bekennen vns diser Bürgschaft vnd Laistung für vns vnd alle vnser nachkomen, die an vnser Statt komen vnd gesetzt werden, vnd globen bey guten trewen, das alles zu halten vnd zu thun, getrewlich vngevarlich. All Artikel Jn disem brief begriffen gereden vnd versprechen wir, obgenanten verkeüfer, für vns, vnser Bruder Burckharts säligen Kindt, vnser vnd Jr erben, vff vnser guten trew, an Aidt statt, war,

stäth vnd vest zu halten vnd zu thun, vhn all eintrag vnd widerred, vnd da wider nit zu sein, zu thon noch schaffen gethon werden, durch vns selb noch yemandt anders, vnd die vorge<nannten> bürgen von der Bürgschaft vnd Laistung zu ledigen vnd zu lößen, ohn Jhrn schaden, all geverd hierin aus- <383 r> geschaiden.

Vnd des alles zu warem vrkunt vnd gezeugknus, so haben wir obge<nannten> Zwen verkeüffer, Hans vnd Conradt, fur vns, vnsers Bruder Burckharts säligen Kindt, vnser vnd Jhr erben vnd nachkomen, vnser Jeglicher sein aigen Jnsigel öffentlich gehenckt an disen brief vnd darzu gebeten die frumen vnd vesten Wilhelm vnd Schwartzfritzen, den Jungen, beid von Sachsenheim, vnser Vettern, das Jr Jeglicher sein aigen Jnsigel zu gezeugnus der obge<nannten> ding zu den vnsern auch gehenckt haben an disen brief.

Des wir, die Jetzge<nannten> zwen Wilhelm vnd Schwartz Fritz, vns bekennen, doch vns ohn schaden.

Vnd wir, die obge<nannten> Schulthais vnd Richter zu grossen Sachsenheim, weil wir aigen Jnsigels nit haben, so haun wir fleissig gebeten die vesten Junckher Rienhardt von Newhausen, den Eltern, vnd Hansen <383 v> von Münchingen, vnser lieb Junckhern, das Jr Jeglicher sein aigen Jnsigel zu gezeugnus der obge<nannten> ding, vns vnd vnser nachkomen damit zu besagen, öffentlich gehenckt hat, auch an disen brief.

Des wir, die yetztge<nannten> zwen Rienhardt vnd Hans, vns deren besigung von Jr gebett wegen gethan haun, doch vns ohne schaden.

Geben am Montag vor dem Hailgen Pffingstag, von Christj geburth Vierzehenhundert sechtzig vnd acht Jar.

Diser brief ligt bey andern dero Früemes briefen, <384 r + v leer, 385 r>

03 Beschreibung des Ossweiler Pfründhofs

03-01 Rechtslage

Järlicher vnablösiger Dinkel vsser dem nachgemelten Hof vnd Güetern, Järlichen vff Martinj gefallendt:

Gregorius Fleins, alten Schulthaißen zu Bissingen, Wittib hat Innen vnd besitzt ainen Hof daselbsten zu Bissingen, der Oßweiller Hof genannt, den vor Jarn der Steltzer oder Kilian auch alda Ingehabt vnd besessen haben, der Jst sein Inhabers erbguth. Daraus hat er hieuor dero Friemes zu Järlicher Zins Frucht vnd Järlicher vnablösiger gült, wolgeseüberter frucht vnd Kaufmans gut gezinst, gereicht vnd gegeben vier Malter Dinkel Alt Gröninger meß, die thun new <385 v> Landmeß drey schöffel, so man hinfüro vff Martinj reichen vnd beim hofman vff dem thennen zu Bissingen empfahren solle, alles wol geseüberter Frucht vnd Kaufmans guth.

Jdem

Dinkel New Landmeß 3 schöffel

03-02 Besitz des Ossweiler Pfründhofs

Hernach volgendt die Güeter Jn den genannten Hofe (sowie Jch, der Renovator, Jn diser neuwerung erfarn mögen) gehorig:

01-D Ain behausung, Scheuren, Hofraitin vnd garten, aninander, oben Jm Dorf, zwischen Ludwig Schulern vnd Michel Schmolenwein gelegen, stost hinden an Dorfs graben vnd vornen vf die gemeinen Allmeindt gassen. <386 r>

Äcker Jn der Oberrn Zelg

01-O-01 Drey Morgen vngevarlich ackers, hinder der Kürchen, zwischen Hans Bissen vnd Hansen Volmarn gelegen, Stossen oben vff den Reminker weg vnd vnden an widumb acker.

01-O-02 Drey Morgen ackers daselbst, zwischen Nisj Fuderers erben vnd Hans Volmern gelegen, Stost oben vff den widem acker vnd vnden an Reminker weg.

01-O-07 Anderhalb Morgen ackers am Bergamer furth, zwischen der gemeinen allmeindt vnd dem widem <386 v> Acker gelegen, Wenden gegem Dorf hinein vff Hans Glessen vnd stossen mit dem Spitzen wider an gemelte allmeindt.

01-O-06 Drey Morgen vngevarlich Ackers vnd wisen Jn der Ow, zwischen Conradt Liechtenstein, auch Martin Rödern, Hans Wennagel vnd Hans Schellen gelegen, Stossen oben an Conradt Liechtenstein vnd vnden wider vff Hans Wennagels wisen vndern bergen.

01-O-05 Zwen Morgen Ackers hinderm Koppele, zwischen Hans Bissen vnd Hans Vischers wittib gelegen, Stossen oben vnd vnden vff Stoffel Herenman.

01-O-08 Ain Morgen ackers vff der Höhe, zwischen Conradt Ruckenbrot <387 r> vnd dem gwendt gelegen. Stost hinden vff Schitzingen Hofäcker vnd vornen an Lorchheimer Hofacker.

01-O-10 Ain Morgen Ackers vngevarlich Jm langlocher weg, zwischen Hans Miller vnd Hans Vischers wittib gelegen. Stost oben vff Marx Fuderer vnd vnden an widem acker.

01-O-11 Zwen Morgen ackers ob dem sehe, zwischen dem widem acker vnd Peter Volmer gelegen, Stossen hinden vff Conradt Ruckenbrot vnd vornen vff Enderis Tenger.

01-O-12 Anderthalb Morgen ackers daselbst, zwischen Jacob Zehen zu Engerschen, <387 v> vnd dem widem acker gelegen, stossen oben vff Bastian Mocken vnd vnden an Martin Schneyder vnd Marx Fuderern.

01-O-13 Drew Viertel vngevarlich ackers Jn Creützäcker, zwischen den Schitzingen Hofäckern vnd Bernhardt Tenger gelegen, stossen oben vff Dionisius Fuderers erben vnd vnden an Steffan Herenman.

01-O-09 Ain Morgen ackers beim Hohen Creütz, zwischen Michel Schneider vnd Jme selbs gelegen, Stost oben vff Anthonj Wunderer vnd vnden an Jhne gültgebern selbs.

01-O-15 Ain halben Morgen ackers gegem Dorf herein, zwischen Othmar Höppen <388 r> erben vnd der anwand gelegen, stost oben vff Anthonj Wunderer vnd vnden an widem acker.

01-O-03 Zwen Morgen vngevarlich ackers vor der Keltern, zwischen dem Lorchheimer Hofacker vnd Anthonj Grossen gelegen, Stossen oben vnd vnden wider vff bemelten Lorchheimer Hofacker.

01-O-04 Ain halben Morgen ackers daselbsten, zwischen Eberhardt Machel zu Vayhingen vff den fildern vnd der anwanden gelegen, Stost vornen vff Marx Schneyders vnd hinden an Conradt Ruckenbrot.

01-O-14 Vier Morgen ackers Jn der eckhers Herdt, zwischen Bissingen all- <388 v> meindt vnd der Anwanden gelegen, stossen hinden vff Petrij Schmolenswains Junge Kinder vnd vornen an Agnes, Thobias Weissen Witwe.

01-O-16 Ain Morgen vngevarlich ackers zu Hohen Bronnen, zwischen Bessigkhaimer straßen vnd der anwanden ackern gelegen, stost oben vff Gall Eberlin vnd vnden vff Jörg Meckessers erben.

Jn der Mittlen Zelg

01-M-01 Ain Morgen ackers hindern linden garten, zwischen Thoma Wunderer vnd Michel <389 r> Schellen gelegen. Stost oben vff Martin Bissen vnd vnden an Zachariam Zeitgnug.

01-M-02 Anderhalb Morgen ackers, vff der Lentel zwischen Hansen Volmern vnd den widem äckern gelegen, Stossen oben vff genannte lentel vnd vnden an Jörg Tenger.

01-M-03 Ain halben Morgen ackers, wendt gegen dem lentel hinein, zwischen dem widumb vnd des Hailgen Sanct Kilians hofacker gelegen, stost oben vff bestimmte lentel vnd vnden auf Jörg Tenger.

01-M-04 Ain halben Morgen vngevarlich ackers Jn der Höhe, zwischen Bastian Mocken vnd der anwanden <389 v> gelegen, stost oben vff den lorchheimer hofacker vnd vnden an Matheum Volmer.

01-M-05 Anderhalb Morgen vngevarlich ackers beim vnholden Bömlin, zwischen Jacob Geiger vnd Martin Schneidern gelegen, Stossen oben vff Conradt Ruckenbrot vnd vnden vff alt Hans Werners Wittib.

01-M-06 Siben Morgen vngevarlich ackers vnderm Dammerweg, zwischen Alexius Klein vnd Hans Schellen gelegen, Stossen oben vff den gültgebern selbs vnd vnden an Peter Volmer.

01-M-14 Acht Morgen vngevarlich ackers ob dem Löchlin, zwischen dem wi- <390 r> dumb acker vnd Lienhardt Tenger gelegen. Stossen oben vff Mölchior Mansperger vnd vnden an Hans Wennagel vnderm Berg.

01-M-10 Anderhalb Morgen ackers am Dammer weg, zwischen Enderis Tenger von Damm vnd Joß Ruoffen gelegen, Stossen hinden vff Martin Schneider vnd vornen an widem acker.

01-M-11 Drey Morgen vngevarlich ackers vnderm Dammerweg, zwischen dem widumb acker vnd der anwanden ackern gelegen, Stoßen oben vff Martin Rödern vnd vnden vff Bernhardt Tenger.

01-M-07 Ain Morgen vngevarlich Ackers, auch vnderm Dammerweg, <390 v> zwischen Stoffel Herrenman vnd Jörg Rissen gelegen, Stost oben wider vff Jörg Rissen vnd vnden an Hans Volmer vnd Stoffel Herenman.

01-M-09 Ain Morgen ackers wendt vff bemelten Dammerweg, zwischen Enderis Brackenheimer vnd Wolff Millern gelegen, Stost oben vff Peter Zeitgnug vnd vnden an Balthus Schabers acker.

01-M-12 Drew Viertel ackers ob dem Dammerweg, zwischen dem Schützingen Hofacker vnd Marx Furderer gelegen, stossen oben vff Mathis Volmers Wittib vnd vnden vff Mölchior Etzel.

01-M-13 Vierthhalb Morgen vngevarlich ackers Jn der eckhers Hördt, zwischen <391 r> des Hailgen Sanct Kilians Hofacker vnd den anwanden äckern gelegen, Stossen oben vff Michael Vißenheußer vnd vnden an Claus Guthjar.

Jn der Vndern Zelg

01-U-01 Drew Viertel ackers Jm Hammerschlag, zwischen Michel Engelhardt von Möglingen vnd Hans Bissen gelegen, Stossen oben vff Hans Fürderer vnd Niclaus Maier vnd vnden an die Aal.

01-U-02 Anderthhalb Morgen ackers vff dem spitz, zwischen Hans Miller vnd Jacob Golter gelegen, stossen oben vff Peter Volmer vnd vnden an lorchheimer hofacker. <391 v>

01-U-03 Funf Morgen ackers vngevarlich beim vnholden Bömlin, zwischen Mölchior Etzel vnd Martin Röderers wißen gelegen, Stossen oben an allmeindt weg vnd vnden vff Hansen Volmarn.

01-U-04 Drey Morgen ackers beim stumpen Bömlin, zwischen Jorg Flein vnd Alexio Klein gelegen, stossen oben vff Asperger Strassen vnd vnden an des Hailgen Hofacker.

01-U-05 Ain Morgen ackers vnderm mitteln weglin, zwischen Peter Zeitgnug vnd Laux Schmiden gelegen, stost hinden vff Hans Schellen vnd vornen vff Jacob

Riebners Kinder. <392 r>

01-U-10 Drey Morgen vngevarlich Ackers vnder der Asberger straßen, zwischen Bernhardt Tenger vnd Peter Zeitgnug ein vnd anderseits Hainrich Schulthaißen von Damm gelegen, Stossen oben an Lorchheimer Hofacker vnd vnden vff Bastian Mocken.

01-U-11 Drey Morgen ackers, auch vnder der Asperger strassen, zwischen Theus Volmer vnd dem widem acker gelegen, Stossen oben vff Hans Volmar vnd Martin Schneiders vnd vnden an Bechtoldt Hegelin von Damm.

01-U-06 Zwen Morgen ackers ob der Asperger strassen, zwischen Stoffel Herrenman vnd dem lorchhaimer hofacker gelegen, stost <392 v> oben vff alt Hans Werners wittib vnd vnden an Eberhardt Mucheln von Vayhingen vff den Fildern.

01-U-07 Ain Morgen ackers gegen strassen ziehendt, zwischen Lorchhaimer Hofacker vnd Conradt Ruckenbrot gelegen, Stost hinden vff Dionisius Fürderers erben vnd vornen an Schützingen Hofacker.

01-U-12 Drithalb Morgen vngevarlich acker hindern gemeinen Bissingen Holtz, zwischen Michel Schell vnd Jacob Geiger vnd Bernhardt Tenger gelegen, Stossen oben an Jung Wolff Miller vnd vnden wider vff gemelt Bissingen Holtz. <393 r>

01-U-13 Zwen Morgen vngevarlich Ackers, an der braiten Egarten, zwischen Martin Röderer vnd Jörg Tenger gelegen, Stossen hinden vff den gemeinen Bissingen waldt vnd vornen an Peter Volmer.

01-U-14 Anderthalb Morgen Ackers vngevarlich am Marpacher weeg, zwischen dem Widem acker vnd Hans Volmern gelegen, Stossen oben wider vff den widem acker vnd vnden vff Peter Volmer.

01-U-15 Sechs Morgen vngevarlich Ackers ob der Brandthalden, zwischen Alexio Klein vnd Thomas Wunderer gelegen. Stossen oben vff Peter Volmer vnd vnden an Matheum Volmer. <393 v>

Wisen

01-P-02 Ain Morgen wisen vngevarlich oben aus, zwischen Hans Glessen vnd dem Bergamer wasser gelegen, Stost oben an Kilian Schneyders erben vnd vnden vff Hans Volmarn.

01-P-03 Ain Morgen wisen vff dem Furhaupt, zwischen Martin Schmolenweins wittib vnd Hans Hagen gelegen, stost oben vff Stoffel Zeirenman vnd vnden an Hans Stahels vnd Mölchior Etzel.

01-P-04 Ain Morgen wisen am weylerbach, zwischen Stoffel Herenman <394 r> vnd gemelten Bach gelegen, Stost oben vff Martin Rederer vnd vnden an Wolff Miller.

01-P-05 Ain halben Morgen wisen, zwischen der Entz vnd den Lorchheimer Neün

morgen gelegen, Stost oben vff den Weylerbach vnd vnden wider an bestimbte Neün Morgen.

01-P-06 Ain halben Morgen wisen vff der lang wisen, zwischen Jung Wolff Miller vnd Mölchior Etzel gelegen, stost oben vff Jacob Kössers zuo Gröningen wittwe vnd vnden an des Flecken Bissingen waldt.

01-P-07 Ain Morgen wisen auch vff der lang wißen, zwischen Michel <394 v> Visenheüsser vnd Matheus Volmers wittib gelegen. Stost oben vff Michel Schell vnd vnden an Bissinger Waldt.

Waldt

01-S-01 Ain Achtel walts vngevarlich Jn lang wißen, zwischen Bebion Grossen vnd Jung Wolff Miller gelegen, Stost oben vff den Bissinger Waldt vnd vnden mit dem spitzen wider an Jung Wolff Miller. <395 r>

03-03 Weitere Zinsverpflichtungen des Ossweiler Hofes

Nota: Diser Jetzt bemelt Hove zinst auch weiter, wie hernach volgt, namlich:

Jn die Kellerey Sachsenheim: Dinkel funf Schöffel vnd ain halb Simmerin, Landmeß,

Jn die Gaistlich verwalung zu Gröningen: Rocken 13½ Schöffel, ½ Vlg., Dinkel 15 Schöffel, Habern 16½ Schöffel, Erbis 1 Simrj. 1½ Vlg., Linsen. 1 Simrj. 1½ Vlg., Rüeben 1 Simrj 1½ Vlg., alles new Landmes <395 v>

03-04 Rückzinsler

So zinsen etliche sondere Personen wider Jn disen hof, vsser etlichen güetern, vermög der Gaistlichen verwalung zu Gröningen legerbuch, nämlich:

Gelt 1 lb. 10 ß.

Dinkel 5 Malter, 6 Simrj, Habern 2 Malter, 2 Simrj, alt Gröninger Meß.

Welchermaßen dise Dinkel gült vnd Zins frucht, an dise früemes komen vnd kauft worden, wie auch die Järlichen gereicht vnd vsser dem Hof entricht werden soll, Jst Jn dem Kaufbrief, hievornen beim andern hof vnd gült nach lengs Jnsertirt vnd begriffen zu sehen vnd zu vernemen. <396 r + v leer, 397 r>

04 Schluss

04-01 Summa

Summa vber dero Friemeß einkommen Jm Flecken Bissingen:

Rocken

Jarlicher vnablesseiger Rocken vff Martinj gefallendt, new Landmeß: 11 schl. 4 srj.

Dinckel

Järlicher vnablenessiger dinkel vff Martinj gefallendt, new Landmeß: 15 schl. 6 srj.

Habern

Järlicher vnablässiger Habern vff Martinj gefallendt, new Landmeß: 14 schl. 1 vlg.
<397 v>

Erbiß

Järlich vnablässig vff Martinj gefallendt, Landmeß: 1 srj. 1½ vlg.

Leinsen

Järlich vnablässig Leinsen vff Martinj gefallendt, new Landmeß: 1 srj. 1½ vlg.

04-02 Editionsbericht

Beim Abschreiben des Urtextes habe ich mich bemüht, alle Schreibvarianten deutlich zu machen, auch die Satzzeichen so zu setzen, wie sie im Original erschienen, wobei dort Punkte von Kommata nicht immer klar zu trennen sind.

Bei der Edition habe ich die Rechtschreibung etwas normalisiert, die großen "Z" in kleine umgesetzt, die "s"-Schreibung angepasst, auch die Zeichensetzung auf heutigen Rechtschreibstand gebracht. Auch die Namensschreibungen habe ich vereinheitlicht. Folgende Tabelle zeigt die "Normalschreibung" und die jeweiligen Varianten bei den Personen- und Flurnamen:

Verwendete Schreibung	Varianten
Gensschopf	Gännßschopff
Hans	Hanns, Hannß
Mock	mockh
Peter	Petter
Ruckenbrot	Rückhenbroth, Ruckhenbroth
Tenger	denger, Dennger
Theisser	Deisser